



Wasser und Trockenheit – ein Gedicht

Beitrag

Gedanken in Gedichtform zu Wasser und Trockenheit – von Marga Leingartner aus Rosenheim

Das Wasser – unser aller Lebenselixier

Zur Zeit hobn ma a grouße Trockenheit,

Weils net renga tuat und aa net schneit.

A paar Tog Sauwetta daatn net schodn,

aa, wenn ma an Sunnaschein liaba hobn.

Wenns lang nimma mehr renga tuat,

Des is für de ganz' Natur net guat.

Nirgendwo taat a Lebn mehr stecka.

Und mia müassatn olle varecka.

Ohne Wassa taatn d'Pflanzn und d'Tiere draufgeh,

und es gabat koa Bier, koane Radi und koane Weißwürst.

Is des schee?

Vo Luft und Liebe ko ma net lebn.

Mia brauchan aa wos z'Essn und z'Trinka,

Sunst tuats uns boid nimma gebn.

Des Gros is zur Zeit ganz trocka.

Mit dem Hei kost koa Kuah außi locka.

Des gibt koa gscheite Milli, des derfst glaabn.

Aus'm Eita tuat höchstens a Muichpuiva außi staubn.

De Fisch kanntn nimma schwimma.

De ganz' Natur hätt nix mehr z'trinka.

Ohne Wassa trocknet oi's aus.

Und mia waarn aa dabei – o graus.

Mia kannt'n nimma Schifferl fahrn,

d'Fischer kannt'n nimma angeln in eahnan Kahn.

Koa Frachta kannt uns mehr wos bringa.

Dafür ko koa Schiff mehr sinka.

Vui Hobbies hängen am Wassa dro:

Beim Schifahrn und Eisstockschiassn gehts o.

Im Summa treibn ma uns im kühlen Nass rum.

Ma deaf bloß net dasaufa, des waar dumm!

Ohne Wassa tuat de Erdn aufspringa.

Und mia werdn ohne Feuchtigkeit aa net jünga.

Mia kriagatn an haufa Foitn

und unsane Kloanstn schaugatn aus wia mia Oitn.

Mia datn im Dreck dasticka

und kriagatn olle a Rauchalunga, des is sicha.

Wenn mia uns net waschn könna,

werdn mia boid ois staubige Brüada und Schwestern rumrenna.

Wos hängt no ois am Wassa dro?

Strengts amoi Eia Hirnkastl selba o!

Des Thema Wassa is unendlich.

Ma werd mit'm Nochdenka niamois fertig.

A Feia hätt de höchste Freid

mit da Trockenheit.

Es kannt fressn, so vui wia geht.

A Wassa zum Saufa, des brauchts net.

Gedicht und Foto: Marga Leingartner



BIKE SALE

ROCKY MOUNTAIN bikePARK SAMERBERG

1.490 EURO
STATT 2.600 EURO

SOLO A50

Kategorie

1. Natur & Umwelt

Schlagworte

1. München-Oberbayern
2. Rosenheim
3. Weitere Umgebung